



**Les Fleurs Des Vies Des Saints Et Des Festes De Toute  
L'Annee, Suivant L'Usage Du Calendrier Romain Reforme**

Augmentees des Saints & Bien-heureux Peres Iesuites, de Saint Charles  
Borromeo, & de Sainte Françoise ; Avec le Martyrologe Romain, pour  
tous les iours de l'Annee ...

**Ribadeneyra, Pedro de**

**Paris, 1631**

XIV La vie de saint Valentin, Prestre & Martyr.

---

[urn:nbn:de:hbz:466:1-75749](https://nbn-resolving.org/urn:nbn:de:hbz:466:1-75749)

luy donnoient. Estant donc arriué en la ville d'Athenes, où nostre Seigneur voulut recompenser les grands travaux, les rudes combats, & les glorieuses victoires de son seruiteur, reuelant à l'Euesque d'Athenes que Martinien estoit là, la grandeur de ses merites, & qu'il estoit l'un de ses meilleurs amis: l'Euesque le vint trouver dans l'Eglise couché dessus vn banc. Martinien luy fit la reuerence, & luy d'emanda sa benediction, & qu'il priaist Dieu pour luy: l'Euesque le prie de ne le pas oublier, quand il seroit deuant Dieu. Apres qu'il eut dit: *Seigneur, ie recommande mon esprit entre vos mains, & fait sur soy la benediction, il rendit l'esprit à Dieu en riant.*

La fille qui demeura sur le rocher accomploit ce que le saint luy auoit commandé, viuant du pain & de l'eau qu'il luy auoit laissée, & au bout de neuf mois que le Marinier retourna, elle luy conta ce qui s'estoit passé: comme Martinien l'auoit là laissée, s'estant ietté en la mer, où deux Dauphins l'auoient porté à la riue, & luy pria de luy rapporter vn habit d'homme, avec du pain & de l'eau, & de la leine, & d'amener sa femme pour l'habiller, & luy apprendre ce qu'elle deuoit faire: ce qu'il luy accorda, & sa fille vescu six ans sur le rocher habillée en homme: elle auoit vingt-cinq ans lors qu'elle y fit naufrage, ainsi elle mourut saintement. On l'appella Fontaine: Deux mois apres son decez le Marinier retourna luy porter ses petites necessitez, comme il auoit de coutume, & la trouuant morte, il la porta dans la ville de Cesarée, aduertissant l'Euesque qui elle estoit, & l'estat de sa vie & de son trespas. L'Euesque la fit enterrer en grande solemnité, comme vne seruante de Dieu.

Voilà la vie de l'Hermitte saint Martinien tant persecuté & combattu de l'ennemy commun, vaincu & victorieux, qui a glorieusement triomphé de la chair, du monde, & de l'Enfer. Simeon Metaphraste l'a escrit, & fait croire qu'il l'auoit cogneu: nous y pouuons apprendre plusieurs choses dignes de remarque. La premiere, avec quelle haine le diable persecute les Saints, s'acheurant d'autant plus contre eux qu'il les void croistre en grandeur, pour les faire dechoir de ceste grace excellente, en laquelle ils sont esleuez, afin qu'eux tresbuchans, qui sont comme les piliers & fondemens de la sainteté, le reste de l'edifice qui est appuyé sur eux, soit renuersé, ainsi le grand saint Anthoine nous aduertit, comme l'on peut voir en sa vie. La seconde, combien la chasteté est vne perle precieuse que le diable tafche à nous faire perdre, avec tant de ruses & d'astuces, & à fouiller la pureté de nos ames, tesmoignant ce qu'il fit contre Martinien. La troisieme, qu'il estoit impossible de garder ce precieux ioyau, si nostre Seigneur ne le conserue par sa grace, & que de nostre costé nous y cooperions, fuyant les occasions de la mettre en hazard, sans nous fier en nostre aage, en nostre vertu & victoires precedentes, d'autant qu'en ceste guerre ciuile & domestique de nostre chair, on ne surmonte pas si aisement en combattant, comme en fuyant les occasions de combattre, lesquelles le diable pre-

sente souuent sous couleur de pieté & specieux pretexte de charité: de fait elles commencent par là, & acheuent en sensualité, ainsi que nous apprend Martinien par son exemple, & qu'un feu est amorty par vn autre feu: & qu'il est beaucoup plus expedient d'endurer de peines temporelles en ceste vie, que les eternelles en l'autre: qu'on ne doit refuser aucun peril ny travail, de peur d'offenser Dieu, & pour paruenir au salut eternel de nos ames. Mais ie demanderois volontiers à ceux qui liront cecy comment ils pensent pouuoir esteindre les flammes de la concupiscence, & ce grand brasier qu'attise Sathan en leurs cœurs, estant ieunes, & delicats, bien en point, nourris parmy les conuersations des femmes libres & effrontées, beuuans, mangans & dormans à gogo. Si Martinien apres auoir seruy nostre Seigneur en la solitude tant d'année, macéré son corps de ieunes & austeres penitences, ayant fait tant de miracles, & receu par pure charité ceste pauvre femme que le diable auoit conduit en sa celle, s'estant muni de l'raison, & si bien barricadé contre elle, consentit neantmoins à la fin au péché, l'eust tout à fait commis si nostre Seigneur ne l'en eust preserué, luy donnant le courage de se ietter dans le feu, & assoupir par les flammes exterieures, celles qui embrasoient son cœur. Ceste vie aussi nous enseigne combien nous deuous estre vigilans & retenus en cas semblables, & donne à cognoistre que nous ne sommes pas plus saints que Dauid, ny plus forts que Samson, & que celuy qui a peur de brusler, se doit esloigner du feu, & quelque espee d'homme que ce soit, est vn feu à la femme, & toute sorte de femme peut embraser l'homme, ainsi que nous experimentons tous les iours.

*En Antioche mourut Saint Agabé Prophete, duquel Saint Luc fait mention es Actes des Apostres. A Rauenne sainte Eusque Vierge, & Maure sa nourrice, ayant beaucoup enduré sous l'Empereur Dece, & le President Quinctian furent en fin transperceés du glaue, & finirent ainsi leur martyre. A Melirne en Armerie Saint Polyude martyre, qui apres auoir beaucoup souffert durant la persecution du mesme Dece, emporta finalement la couronne du martyre. A Lyon Saint Iulien martyr. A Todi Saint Benigne martyr. A Rome saint Gregoire Pape I. du nom, lequel gouerna l'Eglise apres Constantin Pape, & du temps de Leon Empereur surnommé Isaurique, al'impieété duquel il s'opposa courageusement, & enuoya Saint Boniface en Allemagne pour y prescher le Saint Euangile. A Angers trespassa Saint Lucinie Euesque, homme de grande sainteté. A Lyon Saint Estienne martyr & Confesseur. A Reate Saint Estienne Abbe, homme de rare patience, au trespas duquel les Saints Anges furent veus assister, ainsi que resmoigne saint Gregoire Pape.*

LA VIE DE SAINT VALENTIN,  
Presre & Martyr.



N T R E les glorieux Martyrs, qui du temps de l'Empereur Claude II. porterent tesmoignage par leur mort de la vraye Foy, & resperdirent leur sang pour Iesus-Christ, le Prestre saint Valentin en-

13.  
F EV.

14.  
F EV.

14.  
F. EV.

fut vn, lequel (l'Empereur estant lors dans la ville de Rome) comme c'estoit vn homme de grande saincteté, & d'une venerable doctrine, fut pris & enchainé, & à deux iours de là on le mena deuant l'Empereur. Claude le voyant luy dit amiablement: Pourquoi, ô Valentin ne veux-tu pas iouir de nostre amitié, ains estre amy de nos ennemis? Le t'ay ouy estimer pour vn homme si sage, & accort, & ie te voy maintenant si vain & superstitieux. Valentin respondit: O Empereur si vous scauiez bien le don de Dieu, vous seriez heureux, & vostre Empire aussi, vous reietteriez les diables & ces statues que vous adorez: & scauriez qu'il y a vn vray Dieu, lequel a créé le Ciel & la terre, & Iesus-Christ son Fils vniue. Il y auoit avec l'Empereur vn homme scauant qui dit a Valentin si haut que tous le peurent entendre: Donc selon cela, que penses-tu de nos Dieux, Iupiter & Mercure? Que ç'ont esté des hommes miserables (dit Valentin) & sales, & qui ont employé toute leur vie en voluptez & plaisirs du corps. Ce scauant entendant ceste response, ne se peut empescher de crier que Valentin auoit blasphemé contre les Dieux, & contre les Gouverneurs de la republique. Et comme Valentin demandoit audience à l'Empereur, & luy disoit qu'il fist penitence du sang des Chrestiens qu'il auoit respendu, & creust en Iesus-Christ, & se fist baptiser, parce que ce seroit vn moyen pour luy de se sauuer & accroistre son Empire, & d'obtenir de grandes victoires contre ses ennemis; à quoy il sembloit que l'Empereur prestast volontiers l'oreille lors que le Prefect de la ville nommé Calphurne cria tout haut: Auez-vous veu comment il seduit nostre Prince? Est-il possible que nous voulions quitter la Religion que nous auons succée avec le lait, en laquelle nous auons esté nourris, & nos peres & nos ayeuls y ont vecu? Claude craignant que par ces paroles il n'arriuaist quelque trouble ou sedition en la ville, il commanda au Prefect d'examiner Valentin, & que s'il ne le payoit de bonnes raisons, qu'il le chastiaist comme vn sacrilege, sinon qu'il ne le condamnaist pas. Le Prefect renuoya la cognoissance de la cause à son Lieutenant Atere, qui le mena en sa maison & le Saint pria Dieu en y entrant d'illuminer ceux qui marchent à yeux clos dans les tenebres de la Gentilité, leur faisant cognoistre Iesus-Christ, la vraye lumiere du monde. Atere qui entendoit tout cela, dit à Valentin: I'ay beaucoup admiré ta prudence, & neantmoins tu dis que Iesus-Chr. est la vraye lumiere. Ce n'est pas seulement (dit Valentin) la vraye, mais qui plus est, la lumiere qui illumine tous les hommes qui viennent au monde. Si cela est ainsi (dit Atere) j'en feray bien-toist l'espreuue. I'ay icy vne petite fille adoptiue, qui est auégle depuis deux ans; si tu la peux faire voir, & luy rendre la clarté, ie croiray que Iesus-Christ est la lumiere & Dieu, & feray tout ce que tu voudras. On amena la fille au Saint, lequel mettant la main sur ses yeux, fit ceste priere: Seigneur Iesus-Christ qui estes la vraye lumiere, illuminez ceste vostre seruante. La fille receut aussi toist la veüe,

& Atere & sa femme se iettât aux pieds de saint Valentin, le suppliant que puis qu'ils auoient Iesus-Christ par son moyen, il leur dist ce qu'ils deuoient faire pour se sauuer. Le Saint leur commanda de briser toutes les Idoles qu'ils auoient, de ieusner trois iours, de pardonner à tous ceux qui les auoient offensez, puis apres se faire baptiser, & qu'en ce faisant ils seroient sauuez. Atere fit tout ce qu'on luy auoit enjoint, deliura tous les Chrestiens qu'il tenoit prisonniers, & fut baptisé avec toute sa famille, qui estoit de quarante six personnes. L'Empereur ayant sceu cela, craignit quelque sedition d'as Rome, & par raison d'estat fit prendre Atere, & tous ceux qui auoient esté baptisez avec luy lesquels furent martyrisés de diuerses sortes de tourments, & saint Valentin, Pere & Maistre d'eux tous, apres auoir esté long-temps en vne estroicte prison, fut battu à coups de bastons & tout brisé, avec des bastons de neuds: & au bout decapité en la voye Flamme, où depuis le Pape Theodore dédia vne Eglise à nostre Seigneur sous son nom. Au Sacramentaire du Pape saint Gregoire, il est fait mention de ce Saint. Le iour de son martyre fut le quatorziesme de Feurier, auquel l'Eglise celebre sa Feste l'an 271. sous l'Empire de Claude II. du nom.

*A Rome deceda saint Valentin Prestre, lequel ayant guery plusieurs malades, & enseigné grand nombre d'ignorans, fut battu à coups de leniers, & decapité sur le chemin qui menoit à la porte qu'on nomme à present Del populo. sous l'Empereur Claude. Item les Saints Vital, Felicula & Zenon. A Terni saint Valentin Euesque, lequel ayant esté long temps battu, & remis en prison, sans vouloir changer de propos, fut decapité sur la muraille par le commandement de Placide Gouverneur de Rome. Au mesme lieu saint Procule Ephebe & Apollone, & dans pres du corps de saint Valentin, furent prins par le commandement de Leonie qui auoit esté Consul, & eurent leurs testes tranchées. En Alexandrie endurerent les Saints Basile, Antoine, & Protolique qui furent iettez dans la mer. Item saint Cyrion Prestre, Basian Lecteur, Agathon Exorciste, & Martin se qui furent bruslez. Au mesme lieu saint Denis & un moine qui furent decollez. A Ransene saint Eleuchade Euesque & Confesseur. En Bithynie mourut saint Auxence Abbé. A mesme iour mourut saint Antonin Abbé du mon Closter lequel voyant son Monastere ruyné de fonds en comble par les Lombards, se retira en solitude à Surrento, où il trespassa pieusement, son corps a fait tousiours plusieurs miracles, mais sur tout a deliuré plusieurs possédez.*

LA VIE DES SAINCTS FAUSTIN  
& Iouite Martyrs.



SAINCT Faustin & saint Iouite tres-valeureux Martyrs de nostre Seigneur, estoient freres, d'une grande famille, mais beaucoup plus illustres d'auoir esté Chrestiens, & respendu leur sang pour Iesus-Christ par vn penible & pieux martyre qu'on leur fit endurer, apres auoir esté inhumainement tourmentez en plusieurs villes d'Italie. Ces bien-heureux Cheualiers de Iesus-Christ estoient natus de Bresse, ville de Lombardie.